

Udin, ai 14 di Novembar dal 2014

Suns: musiche, lenghis minoritariis e creativît

Impuartante ocasion par vierzisi a dutis lis lenghis e lis culturis europeanis, al dîs Fabbro, president de ARLeF

«La musiche, di simpri, e contribuîs a vierzi lis orelis e i cjâfs de int. Soredut se e je di cualitât e, in particolâr, se e je caracterizade di une identitât fuarte.

A “Suns, festival de cjançon in lenghe minoritarie”, che si davuelzarà sabide ai 15 di Novembar al Palamostre di Udin, o cirin di dâ ai furlans propit cheste buine misture », al dîs il president da ARLeF (Agjenzie Regionâl pe Lenghe Furlane), **Lorenzo Fabbro**. «Dilunc de serade si podaran cussì scoltâ lis vôs musicâls di 7 minorancis europeanis e lis lôr lenghis, spieli di ancjetancj popui.

Un spazi di creativît e dialic che o supuartin cun convinzion te otiche di stiçâ, soredut tra i zovins, la viertidure a dutis lis lenghis e lis culturis europeanis, tacant de nestre».

Il Festival al començarà aes 21. Sostignût de ARLeF e organizât di Radio Onde Furlane cun “il Laboratorio” e la associazion culturâl “Euritmica”, in colaborazion cu la Region autonome Trentin – Südtirol, al à in gare vot concorint pe conquiste de vitorie che, come che al è sucedût l’an passât cui sarts Forefingers Up, e sarà la parte par jentrâ al *Liet International* e par gnovis oportunitâts artistichis. Pal Friûl, a saran in gare Elsa Martin (pluripremiade cjantautore di Tumieç) e Aldo Sbadiglio e la Famiglia Ananans in vacanza a Dresda, vincidôrs de ultime edizion dal Premi Friûl di Radio Onde Furlane.